

BARAZA LA WAWAKILISHI ZANZIBAR

Simu Nam. + 255 24 2230602/1
Fax Nam. + 255 24 2230215
Tovuti: www.zanzibarassembly.go.tz



SANDUKU LA BARUA 902,
ZANZIBAR
Barua Pepe: zahore@zanlink.com

HOTUBA YA MAONI YA KAMATI YA KUSIMAMIA AFISI ZA VIONGOZI WAKUU WA KITAIFA KUHUSIANA NA MAKADIRIO YA MAPATO NA MATUMIZI YA OFISI YA RAIS NA MWENYEKITI WA BARAZA LA MAPINDUZI KWA MWAKA WA FEDHA 2018/2019

Mheshimiwa Spika,

Sina budi kwa kuanza kumshukuru Allah (S.W) mwingi wa utukufu na rehma, kwa kutujaalia uhai na Afya njema, na kutuwezesha kukutana tena katika Baraza hili la Tisa, kwa dhamira ya kuendelea kuwatumikia wananchi wa Zanzibar ambao ndio sababu ya sisi kusimama katika Baraza hili. Aidha nakushukuru na kukupongeza wewe Mheshimiwa Spika, kwa jitihada zako na namna unavyoliongoza Baraza hili tukufu kwa ustadi na upeo mkubwa. Ni imani yangu kwamba utaendelea kutuongoza kwa uadilifu na ustadi wa hali ya juu kwa lengo la kuimarisha Demokrasia katika chombo hiki muhimu cha kuwatumikia wananchi.

Mheshimiwa Spika,

Naomba kuchukua fursa hii, kumshukuru na kumpongeza kwa dhati Mheshimiwa Rais wa Zanzibar na Mwenyekiti wa Baraza la Mapinduzi, Dkt. Ali Mohamed Shein, kwa kuiongoza nchi yetu, kwa hekima, busara, uadilifu na ustadi mkubwa kwa muda wote alio madarakani. Hekima na Busara zake anazozitumia katika kuongoza nchi yetu ndizo ambazo zimetufanya hadi leo kuweza kuishi kwa amani na utulivu. Namuombea kwa Allah (S.W) azidi kumpa nguvu na afya njema ili aweze kutuongoza kwa busara zaidi yeye na wasaidizi wake wote.

Sina budi pia kumshukuru na kumpongeza Makamu wa pili wa Rais, Mheshimiwa. Balazi Seif Ali Iddi, kwa umahiri wake mkubwa wa kuyasimamia vyema majukumu ya Wizara zote za Serikali ya Mapinduzi ya Zanzibar.

Aidha; nimshukuru sana, Waziri wa Nchi, Ofisi ya Rais na Mwenyekiti wa Baraza la Mapinduzi Mheshimiwa. Issa Haji Ussi (Gavu), pamoja na watendaji wake wote, wakiongozwa na Katibu Mkuu wa Wizara hiyo, kwa mashirikiano waliyotupatia wakati wa kupitia makadirio ya Bajeti ya Wizara hii. Pia kwa namna ya pekee, nawashukuru Wajumbe wote wa Kamati ya Kusimamia Ofisi za Viongozi Wakuu wa Kitaifa kwa kazi

zao nzuri wanazozifanya wakati wote wa kazi za Kamati, jambo ambalo limepelekea wepesi kwangu kuweza kuiongoza Kamati hii inayosimamia Ofisi muhimu kabisa. Wajumbe wa Kamati wameonesha umahiri,weledi na umakini wa hali ya juu na wameweza kuijadili ipasavyo Bajeti hii na kuhoji mambo mengi ya msingi, kwa lengo la kuhakikisha fedha wanazoidhinisha katika Baraza hili, zinatumika vizuri na kwa maslahi mapana kwa ajili ya kuwaletea maendeleo wananchi wa Zanzibar.

Mheshimiwa Spika,

Napenda kutumia fursa hii pia, kuwapongeza na kuwashukuru Wawakilishi wote waliomo katika Baraza lako Tukufu, kwa kuendelea kuwawakilisha na kuwatumikia wananchi waliowachagua. Ni wazi kwamba wananchi wamejenga imani kubwa kwetu, nasi hatuna budi kurejesha imani kwao, kwa kuwatumikia kwa dhati na kwa moyo wetu wote, kwa dhamira ya kutetea maslahi yao katika Baraza hili tukufu.

Naomba niwakumbushe wajumbe wenzangu kuwa kipindi chetu cha miaka mitano kinakimbia kwa kasi kubwa, hivyo kila mmoja wetu ajitahidi kutekeleza aliyoahidi na kwa pamoja tutakuwa tumemsaidia Mheshimiwa Rais kutekeleza Ilani ya Chama cha Mapinduzi na kukamilisha ahadi zake kwa wananchi waliotuchagua.

Mheshimiwa Spika,

Kabla ya kuendelea na hotuba hii, kwa rufusa yako, na kwa heshima ya kipeee naomba niwatambue Wajumbe wa Kamati ya Kusimamia Ofisi za Viongozi Wakuu wa Kitaifa kama ifuatavyo:

- | | |
|---------------------------------------|--------------|
| 1. Mheshimiwa Omar Seif Abeid | Mwenyekiti |
| 2. Mheshimiwa Panya Ali Abdallah | M/Mwenyekiti |
| 3. Mheshimiwa Ame Haji Ali | Mjumbe |
| 4. Mheshimiwa Amina Iddi Mabrouk | Mjumbe |
| 5. Mheshimiwa Hussein Ibrahim Makungu | Mjumbe |
| 6. Mheshimiwa Mussa Ali Mussa | Mjumbe |
| 7. Mheshimiwa Mtumwa Suleiman Makame | Mjumbe |

Aidha Kamati hii inafanyakazi kwa kusaidiwa na makatibu wawili ambao wamekuwa wakitusaidia kwa kiasi kikubwa na kwa uweledi wa hali ya juu katika kutekeleza majukumu yetu, msaada wa makatibu hao umekuwa chachu ya mafanikio makubwa ya Kamati hii. Makatibu hao ni:

- | | |
|----------------------------|--------|
| 1. Ndg. Karima Abdul-Wahab | Katibu |
| 2. Ndg.Talib Enzi Talib. | Katibu |

Mheshimiwa Spika,

Moja kati ya jukumu la msingi la Kamati yetu ni kuchambua mapendekezo ya Serikali, kuhusu makadirio ya Wizara katika mapato na matumizi ya kila mwaka, hivyo katika kutekeleza jukumu hilo lililoelezwa katika Kanuni ya 96(1), Kamati yangu ilikaa na kuijadili na hatimae kupitisha Makadirio ya Ofisi ya Rais na Mwenyekiti wa Baraza la Mapinduzi, siku ya tarehe 2/5/2018 na leo hii, kwa ruhusa yako na kwa niaba ya Kamati, napenda kuwasilisha maoni ya Kamati kuhusiana na Bajeti hiyo kwa mwaka wa fedha **2018/2019**.

Mheshimiwa Spika,

Baada ya utangulizi huo sasa, naomba nitekeleze jukumu nililopewa na Kamati la kuwasilisha maoni ya Kamati, mbele ya Baraza lako tukufu.

Mheshimiwa Spika,

Ofisi ya Rais na Mwenyekiti wa Baraza la Mapinduzi kwa mwaka wa fedha 2018/2019 ina mafungu mawili tu ambayo ni Fungu **A01**- Ofisi ya Rais Ikulu, na Fungu **A02**-Ofisi ya Baraza la Mapinduzi, na imepanga kutekeleza Programu kuu tano (5) zenye Programu ndogo kumi na moja (11) ambazo kwa ujumla zitajumuisha shughuli zote zinazokusudiwa kutekelezwa katika mwaka wa fedha 2018/2019 kama inavyoonekana katika kitabu kikuu cha Bajeti.

PROGRAMU KUU YA KUSIMAMIA HUDUMA NA SHUGHULI ZA MHESHIMIWA RAIS NA KUIMARISHA MAWASILIANO IKULU.

Mheshimiwa Spika,

Katika programu hii kuu kuna Programu ndogo nazo ni:

1. Programu ndogo ya Kusimamia Huduma na Shughuli za Mheshimiwa Rais
2. Programu ndogo ya Kuimarisha Mawasiliano baina ya Serikali na Wananchi

Programu ndogo ya Kusimamia Huduma na Shughuli za Mheshimiwa Rais, ambayo inayosimamiwa na Ofisi ya faragha inajukumu la kufuatilia utekelezaji wa ahadi na maagizo ya Mheshimiwa Rais, na usimamizi wa nyumba za mapumziko anazozitumia Mheshimiwa Rais.

Kwa ujumla, Kamati yangu inapongeza jitihada zinazochukuliwa na Ofisi ya Faragha ya Mheshimiwa Rais wa Zanzibar na Mwenyekiti wa Baraza la Mapinduzi, kwa kusimamia vyema utekelezaji wa majukumu yao ya kila siku likiwemo lile la kufuatilia ahadi zinazotolewa na Kiongozi wetu Mkuu wa Nchi katika maeneo tofauti, ambapo kwa

mwaka **2017/2018** ahadi za Mh.Rais zilifuatiliwa na kutekelezwa kwa ufanisi chini ya usimamizi wa Ofisi ya Faragha kama inavyoonekana katika kitabu kikuu cha Bajeti.

Aidha, Kamati yangu imefurahishwa na inapongeza Ofisi ya Rais kwa kuziimarisha na kuziweka katika hadhi inayostahiki nyumba za Ikulu ndogo za Micheweni na Chake Chake Pemba. Ujenzi wa Ikulu ndogo ya Micheweni na Chake Chake ambao umefikia katika hatua ya kuridhisha. Pia Kamati imefarajika na Ongezeko la Bajeti kwa mwaka **2018/2019**, kwa ujumla wake, hasa katika Miradi ya Maenedeleo inayosimamiwa na Ofisi ya Faragha, yenye lengo la kuimarisha majengo yanayotumiwa na Mheshimiwa Rais, kwa kweli ni jambo la kupongezwa.

Mheshimiwa Spika,

Kamati yangu inafarajika kwa kuona kuwa maagizo yake yamezingitiwa juu ya tatizo la mmong'onyoko wa ardhi katika Ikulu ya Mkoani, ambapo wizara imechukuwa hatua muafaka kwa kukabidhi fedha kwa ajili ya kazi hiyo kwa wizara ya ujenzi mawasiliano na uchukuzi ili tatizo hilo liweze kumalizika. Ni imani yangu kuwa taasisi iliyokabidhiwa fedha hizo itatimiza wajibu wake haraka iwezekanavyo na fedha hizo zitatumika vizuri ili kuinusuru Ikulu hiyo isiendeleo kuathirika na mmong'onyoko huo.

Mheshimiwa Spika,

Programu ndogo ya pili ni ya Kuimarisha Mawasiliano baina ya Serikali na Wananchi, ambayo inakusudia kuendeleza taswira nzuri baina ya Mheshimiwa Rais na Wananchi wake. Kamati yangu imeridhika na makadirio yaliyopangwa katika Programu hii.

Pia, Kamati imefarajika na hatua zilizochukuliwa na Ofisi ya Rais katika kuimarisha zaidi suala la kumtangaza Rais wetu, na kumfanya awe karibu zaidi na wananchi anaowatumikia kwa kuanzisha akauti za mitandao ya kijamii, vipindi vya radio na TV vinavyoonesha shughuli mbali mbali anazofanya Mheshimiwa Rais katika kuwatumikia wananchi. Tumekuwa tukishuhudia matukio mengi ambayo Mheshimiwa Rais anahudhuria huwa yanarushwa moja kwa moja (Live) kupitia mitandao ya kijamii hasa akaunti maarufu ya facebook ya "*Ikulu ya Zanzibar Update*". Jumla ya vipindi 21 vinavyohusu mambo mbali mbali ya Mheshimiwa Rais vimeandaliwa na kurushwa hewani na vingine vimefanyiwa marudio kupitia Redio na Televisheni. Kuwepo kwa jarida maalum la Ikulu linaloeleza kazi mbali mbali anazofanya Mheshimiwa Rais ni jambo la kupongezwa.

Aidha, Kamati inaomba na kushauri Idara ichukue jitihada za makusudi kuwafikia idadi kubwa zaidi ya wananchi, sio tu ndani ya Zanzibar, bali hata Nje ya Nchi, ambapo mitandao ya kijamii inatumika kwa kiasi kikubwa.

Mheshimiwa Spika,

Suala la ziara za Mheshimiwa Rais nalo limeweza kuratibiwa vizuri. Ziara yake katika nchi za kiarabu (UAE) imeleta tija kubwa kwa wazanzibari hasa kwa kutembelea Nchi ya Ras Al Khaiman ambayo tunatarajia itashirikina na Zanzibar katika utafutaji na uchimbaji wa mafuta na gesi. Ukweli, kufanya hivyo ni utekelezaji wa Ilani ya CCM kwani hilo tuliahidi kwa wananchi kupitia Ilani yetu. Tunampongeza Dk Shein kwa kulisimamia ipasavyo.

Mheshimiwa Spika,

Kamati yangu pia, inapongeza kwa kuchukuwa jitihada za kuweka vipindi mbali mbali vya matukio ya kihistoria yanayohusu viongozi wetu wakuu na nchi kwa ujumla na kuwafanya wananchi wa rika mbali mbali, waweze kujuwa historia ya nchi yao vizuri. Kufanya hivyo kumesaidia kuepusha taarifa za upotoshaji dhidi ya Viongozi wetu, sambamba na kuliwezesha rika la vijana kuifahamu vyema historia ya nchi yetu, wapi tunapotoka, tulipo sasa na tunapoelekea.

Hivyo, kamati imeridhika na utekelezaji wa bajeti iliyopita katika Programu hii, na inatarajia katika bajeti 2018/2019 fedha walizoziomba kwa ajili ya utekelezaji wa Programu hii zitafanikisha utekelezaji wa malengo waliyoyapanga.

PROGRAMU KUU YA KURATIBU USHIRIKIANO WA KIKANDA, MASHIRIKA YA KIMATAIFA NA WAZANZIBARI WANA OISHI NJE NCHI.

Mheshimiwa Spika,

Programu hii ina lengo la kuiwezesha Zanzibar kushiriki kikamilifu katika Mikutano ya Kikanda na Kimataifa, na kuwashirikisha ipasavyo Wazanzibari wanaoishi nje ya nchi kwa lengo la kukuza maendeleo ya Zanzibar katika nyanja tofauti.

Mheshimiwa Spika,

Katika kuona azma ya kuwepo kwa Idara ya Uratibu wa Wazanzibari wanaoishi Nchi za Nje, inazaa matunda, Kamati yangu inasisitiza kuzingatiwa ushauri wake kwamba, jitihada zaidi ziongezwe katika kuwavutia wawekezaji wenye asili ya Kizanzibar, kuja kuwekeza katika sekta mbali mbali ikiwa ni pamoja na Sekta Ya Utalii. Aidha, Idara inatakiwa kujitahidi zaidi kuhamasisha wazanzibar walipo Nje kusaidia ndugu zao waliopo Zanzibar kama vile walivyofanya wazanzibari waliopo Denmark ambao wametoa mchango mkubwa wa vifaa katika Sekta ya Afya na Elimu kwa ndugu zao wa Zanzibar kupitia jumuiya yao ya **AHAS GRUOP**.

Mheshimiwa Spika,

Kamati imefurahishwa na jitihada za Idara hii kwa kuweza kutekeleza yale iliyojipangia. Mbali na kuwa Idara imeshiriki katika mikutano kadhaa ya kimataifa, na kushiriki mikutano ya Jumuiya za Kikanda. Kamati yangu inataka kuona zaidi matokeo ya kushiriki katika mikutano hiyo na namna wazanzibari wanavyofaidika nayo. Aidha kuhusu Mikataba ya Kimataifa ambayo Tanzania imeridhia ni mategemeo ya kamati kuona kwamba mikataba hiyo itawanufaisha wananchi wa Zanzibar.

PROGRAMU KUU YA UTAWALA NA UENDESHAJI WA OFISI YA RAIS IKULU

Mheshimiwa Spika,

Katika Programu hii kuna Programu ndogo nne nazo:

1. Uratibu na usimamizi wa shughuli za Ofisi ya Rais na Mwenyekiti wa Baraza la Mapinduzi
2. Utaribu wa Shughuli za Mipango Sera na Utafiti za Ofisi ya Rais na Mwenyekiti wa Baraza la Mapinduzi
3. Uratibu na Usimamizi wa Ofisi ya Rais na Mwenyekiti wa Baraza la Mapinduzi – Pemba
4. Usimamizi wa Usalama wa Watumishi wa Umma

Mheshimiwa Spika,

Kumekuwepo mafanikio kadhaa yaliyopatikana kupitia Programu kuu hii ambayo ni pamoja na kuwepo kwa Mpango wa miaka mitano wa Rasilimali watu na Mpango wa miaka mitatu wa Urithishwaji watumishi, Kuimarika kwa usalama wa Serikali kupitia ukaguzi wa Wafanyakazi na Majengo na kuanza kwa Utafiti juu ya fursa zinazopatikana katika Jumuiya ya Afrika Mashariki.

Mheshimiwa Spika,

Licha ya mafanikio hayo yaliyopatikana kwa mwaka wa fedha uliopita 2017/2018, Kamati inatarajia kuona kwamba katika mwaka wa fedha 2018/2019, wananchi wa Zanzibar wanafaidika vya kutosha na kupata fursa zitokanazo na uwepo wa Jumuiya ya Afrika ya Mashariki. Kwa mfano wananchi wengi hata wahitimu mbali mbali kutoka vyuo vikuu hawaifahamu vyema Jumuiya hiyo na fursa zinazoweza kupatikana kwa Wazanzibari kutoka katika Jumuiya hiyo.

Vilevile, kuhusu kuwepo kwa Mpango wa miaka mitano wa Rasilimali watu na Mpango wa miaka mitatu wa Urithishwaji watumishi, Kamati inashauri kuwaanda wafanyakazi ili wakati wa kustaafu unapofika wawepo warithi wao ili kushika nafasa hizo.

Mheshimiwa Spika,

Kwa kuwa Programu ya Utawala na Uendeshaji, inajihusisha pia na kufanya tafiti mbali mbali kwa dhamira ya kupeleka mbele maendeleo ya Ofisi ya Rais, Kamati yangu inataka kuona matokeo ya tafiti uliofanywa na Ofisi ya Rais na Mwenyekiti wa Baraza La Mapinduzi (ORMBLM) kwa mwaka wa fedha 2017/2018, zinawasaidia Wazanzibari kufaidika na fursa zinazopatikana katika soko la Afrika Mashariki, hasa hasa vijana wanaohitimu vyo vikuu.

Mheshimiwa Spika,

Kuhusu suala la Kuratibu na Kusimamia Shughuli za Usimamizi wa Shughuli za Ofisi ya Rais na Mwenyekiti wa Baraza la Mapinduzi-Pemba ambayo ina lengo la kuimarisha uwezo wa kiutendaji na uratibu wa shughuli za Ofisi ya Rais na Mwenyekiti wa Baraza la Mapinduzi (ORMBLM). Kabla sijatoa maoni ya Kamati kwa eneo hili, kwa niaba ya Kamati yangu, naomba kwanza nichukue fursa hii, kumpongeza Afisa Mdhamini katika Wizara ya Nchi Ofisi ya Rais na Mwenyekiti wa Baraza la Mapinduzi, Ndg Amour Hamad Saleh, kwa namna anavyoendeleza jitihada za mrithi wake, kwa kweli anafanya kazi nzuri, ikiwa ni pamoja na kusimamia vyema masuala ya ujenzi wa nyumba za ikulu unaoendelea huko Micheweni na Chake Chake. Ni imani ya Kamati yangu kwamba nyumba za mapumziko za Mheshimiwa Rais zinazoendelea kujengwa zitasimamiwa vyema chini ya uwepo wake.

Mheshimiwa Spika,

Katika kuwajengea uwezo wafanyakazi, Ofisi ya Rais inastahiki pongezi kwa kuwajengea uwezo wafanyakazi 18 katika mafunzo ya muda mrefu kwa viwango mbali mbali na wafanyakazi 25 wameongezewa ujuzi katika mafunzo ya muda mfupi. Kupitia Programu hii, wafanyakazi 80 wamepewa mafunzo ya kujikinga na maradhi yasiyoambukiza pamoja na kupima afya zao.

Mheshimiwa Spika,

Lengo la Idara Usimamizi wa Usalama wa Utumishi wa Umma, (GSO) ni kuimarisha shughuli za upekuzi kwa watumishi wa umma, kabla na baada ya kuajiriwa pamoja na kuhakikisha usalama sehemu za kazi. Kwa ujumla, Kamati imeona kwamba utendaji wa

kazi wa Idara hii una mafanikio pamoja changamoto mbali mbali zinazojitokeza katika utendaji wa kazi zao za kila siku.

Mheshimiwa Spika,

Idara ya GSO ni miongoni mwa Idara zenye mazingira magumu ya utendaji kazi, hata hivyo, tunaipongeza Idara hii kwa kuweza kufanya kazi nzuri na kuweza kufanikisha malengo yake kwa kiasi kikubwa. Katika mwaka wa fedha 2017/218, Idara imeweza kufanya upekuzi wa watumishi wa umma kwa mafanikio makubwa. Jumla ya watumishi 2,285 wamefanyiwa upekuzi na jumla ya majengo 8 yamekaguliwa.

Aidha, Kamati inaipongeza Idara kwa kuweza kufikia malengo iliyojiwekea na kuondoa ghofu ya Kamati ya kutokufikiwa kwa malengo hayo hasa kutokana na kasoro za kisheria zilizo katika Sheria inayotumiwa na Idara hiyo Sheria ambayo sasa imeanza kufanyiwa kazi.

Mheshimiwa Spika.

Idara ya Uratibu wa Shughuli za Mipango, Sera na Utafiti za Ofisi ya Rais na Mwenyekiti wa Baraza la Mapinduzi ni Miongoni mwa Idara muhimu ambazo jukumu lake la msingi ni kufanya tathmini ya Sera na Sheria mbali mbali zinazotekelezwa na Ofisi ya Rais na Mwenyekiti wa Baraza la Mapinduzi. Kamati yangu inaipongeza sana Idara hii kwa kuanza kufanya mapitio ya Sheria mbili(2) zilizo chini ya ofisi ya Rais, Sheria hizo ni Sheria ya Usalama wa Taifa na Siri za Serikali, No. 5/1983 inayotumiwa na GSO Katika kutekeleza majukumu yake na Sheria ya Mambo ya Rais No. 5/1993 inayohusu masuala mbali mbali ya Mheshimiwa Rais.

Kamati inaipogeza Idara kwa kuzifanyia mapitio Sheria hizo na kubaini kasoro zake na hatimaye kupendekeza marekebisho yatakayosaidia sana kuimarisha utendaji kazi wa Ofisi ya GSO na Ofisi ya Rais kwa ujumla

Kamati inasisitiza kupatiwa kiwango cha fedha Idara kwa ajili ya utekelezaji wa Programu kuu hii kwa mwaka wa fedha 2018/2019.

OFISI YA BARAZA LA MAPINDUZI

Mheshimiwa Spika.

Kamati yangu kwa umakini pia imepitia Fungu A02-Ofisi ya Baraza la Mapinduzi, ambalo lina Programu ya usimamizi wa Majukumu ya Kikatiba na kisheria ya Baraza la

Mapinduzi na Kamati ya Makatibu Wakuu, na Programu ya Utumishi na Uendeshaji wa Ofisi ya Baraza la Mapinduzi.

PROGRAMU KUU YA USIMAMIZI WA MAJUKUMU YA KIKATIBA NA KISHERIA YA BARAZA LA MAPINDUZI NA KAMATI YA MAKATIBU WAKUU

Mheshimiwa Spika,

Chini ya Programu kuu hii, Kamati yangu, imepatiwa ufafanuzi juu utendaji kazi wa Ofisi ya Baraza la Mapinduzi kwa kipindi cha mwaka 2017/2018. Kamati imeridhishwa na inaipongeza Ofisi ya Baraza la Mapinduzi kwa kuweza kutekeleza kwa ufanisi na Uboru wa hali ya juu malengo waliyojipangia ikiwemo kufanya vikao vya BLM na Kamati ya Makatibu wakuu. Jumla ya vikao 20 vya BLM na 28 vya Makatibu wakuu vimefanyika kwa ufanisi mkubwa. Ni ukweli ulio wazi kwamba vikao hivyo ndio injini ya utendaji kazi wa Serikali na kuwepo kwake ndio kunapelekea taasisi nyingine zote za Serikali kuweza kutekeleza majukumu yao ambayo mara nyingi hutegemea maelekezo na miongozo ya vikao hivyo.

Aidha tunaipongeza Ofisi ya Baraza la Mapinduzi kwa kuweza kuandaa vikao vya kutathmini utendaji wa kila taasisi, maarufu kama *Bango Kitita* baina ya Mheshimiwa Rais na kila Wizara ya SMZ, ambapo vikao 15 vimefanyia. Vikao hivyo vimekuwa na tija kubwa kwani vinasaidia sana kuona zile fedha tunazozidhinisha katika Baraza hili zinatumika kwa

malengo yaliyokusudiwa na kuweza kuleta tija na maslahi mapana ya wananchi tunaowatumikia.

Mheshimiwa Spika,

Kamati imefurahishwa na kitengo cha ufuatiliaji na tathmini cha Baraza la Mapinduzi, kwa kuongeza wafanyakazi wawili wenye ujuzi kwa lengo la kuimarisha utendaji kazi wa kitengo hicho. Aidha, Kamati imeridhika kwa namna ambavyo kitengo kimeweza kufanya kazi nzuri ya kufuatilia Wizara zote katika utekelezaji wake wa Sera, Sheria, Miongozo na Maagizo ya Serikali. Hivyo Kamati yangu inasisitiza kazi hiyo iendelee kwa umakini zaidi ili kila taasisi iweze kufuatiliwa na kutathminiwa namna inavyotekeleza Sera, Sheria, Miongozo pamoja na Majukumu yake ya kila siku kwa lengo la kupeleka mbele maendeleo na juhudi za Serikali.

Hivyo Kamati imeridhika kwa kiasi kikubwa fedha walizozomba Ofisi ya Rais kwa mwaka wa fedha **2018/2019** na kuamini kwamba zitaweza kutekeleza malengo ya **Fungu A02** la Baraza la Mapinduzi.

Mheshimiwa Spika,

Kwa ujumla, Kamati yangu imeridhishwa na utekelezaji wa bajeti ya Ofisi ya Rais ya mwaka 2017/2018 na imeridhia bajeti iliyopendekezwa ya Ofisi ya Rais na Mwenyekiti wa Baraza la Mapinduzi, kwa mwaka wa fedha **2018/2019** ambayo ni jumla ya Tsh. **10,433,700,000** kwa Fungu la **A01** na **A02**, zilizoambatana na ufafanuzi wa mipango mbali mbali ya mwaka mzima. Aidha, Kamati yangu imeridhika kwa ongezeko la fedha ambalo zimekezwa katika ununuzi wa Mashine ya Ukaguzi Ikulu, Bajeti ya Washauri wa Mheshimiwa Rais pamoja na shughuli za kumtangaza Mheshimiwa Rais hasa vijijini na Kuimarisha Shughuli za Upekuzi wa Wafanyakazi, ukaguzi wa Majengo na Miundo Mbinu. Aidha, kuimarisha mazingira katika nyumba ya Ikulu Dodoma na Chakecheke (Pemba). Pia, ongezeko la fedha katika kufanikisha Shughuli za Kitengo cha Ufuatiliaji na Tathmini, hivyo, Kamati inatarajia fedha hizo kutumika kama zilivyokusudiwa katika Bajeti 2018/2019.

HITIMISHO

Mheshimiwa Spika,

Baada ya maoni hayo ya Kamati yangu ambayo yamejikita katika Programu kuu na ndogo, nasisitiza kwamba lengo la maoni hayo ni kuimarisha utendaji katika kila taasisi iliyo chini ya Afisi ya Rais na Mwenyekiti wa Baraza la Mapinduzi, ili kuhakikisha wizara hii inatekeleza majukumu yake kwa ufanisi mkubwa. Aidha, ni imani ya Kamati yangu kuwa, baada ya Hutoba nzuri iliyosomwa na Mheshimiwa Waziri, pamoja na maoni haya ya Kamati ya Kusimamia Ofisi za Viongozi Wakuu wa Kitaifa, nawaomba Wajumbe wengine wa Baraza lako tukufu, waichangie vyema Bajeti hii, kwa lengo la kupata utekelezaji bora wenye maslahi kwa wananchi wetu.

Mwisho kabisa, napenda kukushukuru tena, wewe binafsi, Mheshimiwa Spika, kwa kunipa nafasi ya kuwasilisha maoni ya Kamati yangu kwa niaba ya Kamati, pamoja na kuwashukuru Wajumbe wa Baraza lako Tukufu kwa kunisikiliza kwa umakini mkubwa, sasa niwaombe Wajumbe wa Baraza lako waijadili na hatimae waiunge mkono Bajeti hii, ili wamuwezeshe Mheshimiwa Waziri kufanikisha na kutekeleza yale waliojipangia katika mwaka huu wa Fedha.

Mheshimiwa Spika,

Mimi mwenyewe binafsi na kwa niaba ya Kamati ninayoiongoza ya Kusimamia Ofisi za Viongozi wakuu wa Kitaifa, naiunga mkono hoja kwa asilimia 100.

Naomba kuwasilisha

.....

Mheshimiwa Omar Seif Abeid

Mwenyekiti,

Kamati ya Kusimamia Ofisi za Viongozi Wakuu wa Kitaifa,

Baraza la Wawakilishi,

Zanzibar.